

摘藻堂四庫全書薈要

集部

欽定四庫全書薈要

集部

元詩選三集卷十一



詳校官編修臣王天祿

欽定四庫全書薈要卷二萬四百六十五

集部

元詩選三集卷十一

長洲 顧嗣立

編

高明柔克齋集

明字則誠永嘉平陽人至正五年張士堅榜中第
長才碩學為時名流授處州錄事辟丞相掾方國
珍叛省臣以溫人知海濱事擇以自從與幕府論
事不合國珍就撫欲留置幕下即日解官旅寓鄞
之櫟社沈氏樓居因作琵琶記記成時清夜按拍



歌舞几上蠟炬二枝光忽交合因名曰瑞光樓明
太祖聞其名召之以老疾辭還卒於家所著有柔
克齋集詞章斐然東海趙汭稱其學博而深才高
而瞻云

宿先公房曉起偶成

曉雨池上來微風動寒綠幽人睡初起開窻見脩竹西
山帶曾雲隱隱出林木境寂塵自空慮澹趣常足獨坐
無晤言流泉下深谷

夏夜獨坐簡胡無逸二首

夜靜坐前軒明月方皎皎
大火既西行涼風在木杪
庭際促織鳴涼露下芳草
緬懷羈旅人重感歲時老
安得躋空同一問廣成道

夜久羣動息境寂無炎蒸
涼飈散浮雲惟見河漢明
緬懷塵紛勞喜際夜氣清
安得舍所趨白日澹無營
仰看斗柄移耿耿低玉繩
天運亦有常吾生何時寧

楊季常約至山中既而不果因以詩寄三首

仙人海上來駕言遊蒼冥乃逢浮丘伯駐之紫霞城鳳凰不可招梧桐何青青焉知碧山月期子待吹笙

天寒木葉下短景淒其清幽居有所思振衣臨黃庭仰觀冥鴻飛竟與浮雲迎悵望不可見空山暮雨生

秋菊有餘色可以慰幽情豈無一樽酒泛此黃金英美人久不來歲晏霜露零坐感芳草歇佳期悵未能

題蘭

美人在空谷娟娟抱幽芳長林自荆棘安能敝馨薌借

君水蒼玉與我紉佩纓願結善人交歲晚無相忘

賦幽慵齋

閉門春草長荒庭積雨餘青苔無人掃永日謝軒車清
風忽南來吹墮几上書夢覺聞啼鳥雲山滿吾廬安得
嵇中散尊酒相與娛

王節婦詩

清清慈谿水蘋藻被涯涘昔年脩婦職采蘋薦明祀殷
勤執豆籩齋肅事君子一朝雙鴛鴦別離隔生死死者

無還期生者當同歸奈何姑嫜老重以膝下兒升堂奉
甘脆篝鐙訓詩書庶以未亡人慰彼泉下思谿水彼可
竭妾身不改節谿水有停汙妾心但明潔熒熒瑤臺鏡
玄髮今已雪孤鸞雖不舞寒影自澄澈谿水常流東餘
波總相從結髮為夫婦永別何由逢青山有玄寂百歲
須當同願言合歡樹化作壠上松薦蘿更纏綿相依無
終窮

昭君出塞圖

竟寧關氏出塞城聲婆聲斷淒龍庭邊雲竟與漢月隔
野草空作春風青漢廷公卿無遠舉忍遣嬌姿去華土
豈知劉白與楊樊復把丹青罔人主當時國計不足論
佳人失節尤可歎一從雕陶莫皋立回首不念稽侯獮
網常紊亂迺至此千載玉顏猶可恥蛾眉儻不嫁單于
滅火安知非此水良工妙畫不必觀勿因一女譏漢元
宮闈制馭苟失道肘腋變起非一端君不見玉環自被
祿兒污豈是丹青解相誤

題支離叟

錢塘門裏支離叟，短髮蕭疎色鰲垢。
雪霜歲晚結輪囷，風雨年深增老醜。
挫鍼治癰總無能，欲與冥靈齊上壽。
天公怒此怪且癩，勅遣靈官下搜取。
勾婁吉利忽飛來，虎倒龍顛盡灰朽。
女蘿飄騰白鶴去，琥珀迸流青羊走。
繁陰已逐謝仙車，枯榦徒存韋偃手。
邇來好事猶痛惜，歎息形模無復有。
寧知百年皆夢幻，靜看萬變互紛揉。
榮枯相尋無已時，成壞有數原非偶。
南山誰信梓化特。

昆侖俄驚柳生肘
朝菌何曾閱晦朔
棧樸那知避薪樵
全軀孰似櫟社樹
絜之百圍今在否
人生根蒂不可牢
況為草木計
近久野客空歎倚江柵
老奴謾泣琅琊柳
寒煙落日西湖邊
衰草荒廬園數畝
不見當時鐵門限
春蚓秋蛇徒蚴蟉
玄雲飛盡墨池空
直寄亭前誰酹酒
西湖葛嶺瑪瑙寺
僧芳洲有古琴二
一名石上
枯一名蕤賓鐵
為賦詩二首

葛仙嶺上瞿曇宮
老僧雪眉覆雙瞳
奇琴久蓄欸識古

云是零陵水邊石上之枯桐憶昔蛟龍宅其湫霹靂斬
龍樹亦死道人作琴傍水彈幾夜湘江泣帝子邇來居
我瑪瑙坡聲價壓倒伽陀羅嵇心羊體妙相得有耳不
聽西湖歌松窗茶屋夢初醒別鶴淒淒怨煙嶺隔水通
仙夜不眠聽盡梅花山月影

師琴名以蕤賓鐵豈是七絲專一律古來聲律商與宮
一百四十四調終於一又聞古鐵能解音何況聖人所
作之雅琴琵琶纔聞鐵自躍萬物豈不通琴心憶昔重

華為民鼓拂拂薰風吹下土九官佩玉和鏗鏘鳳皇來
儀百獸舞無情相感若有情蜀山欲破銅先鳴從今却
笑陶淵明胡為不取弦中聲禪關萬竹淨塵垢月出西
湖照窗牖此時請師為鼓一再行試聽還有鐵聲否

題畫

秋山積雨清浮埃曉日照耀金銀開草堂陰深冷竹樹
石梁滑遶欹莓苔千峰蒼翠淨如拭白雲不放楓葉赤
何人艇子出清江水落山高如赤壁昨夜天寒霜露零

山人不歸猿鶴驚孤松三逕依舊在僮僕正遲陶淵明
題畫龍

何人咒縮昆明水一夜溪邊紅葉起銀河捲上洞庭峰
橘樹寒煙秋色裏恍如陵陽竇子明又疑句曲茅初成
淋漓元氣無青冥馬髮搖動天瓢傾乾坤萬里蘇旱暵
草木無言生意悅歸來高卧碧潭雲獨抱神珠弄明月
題畫虎

秦宮紫玉忽變神似來潯陽訪石人黃公赤刀制不得

吼怒驚倒裒將軍固知兩脅橫乙骨莫令雙耳多生缺
黃蘆風緊殺氣寒嘯聲撼動秋山月山空月冷不可留
人間苛政皆爾儔踟躕亦欲渡河去劉昆宋均今有否
題蕭翼賺蘭亭圖

客舟夜渡中冷水空山不見羲之鬼驪珠飛去龍亦驚
月落空梁僧獨起銀鈎繭紙歸長安蓬萊宮裏人爭看
一朝風雨暗園寢玉桺槌碎昭陵寒龍眠畫手元暉筆
當時曾笑蕭郎失至今二子亦何在久與蘭亭共蕪沒

人生萬事空浮漚走舸復壁皆堪羞不如煮茗卧禪榻
笑看門外長江流

白紵篇送顧仲明

吳中二八深閨女生來不學唱金縷纖纖素手青燈前
織得寒機成白紵裁縫熨貼為君衣春天衣著生光輝
明珠為璫璧為佩同此素色無相違一朝送君江上別
歲晚關河積風雪生知白紵不勝寒但喜君身常皎潔
君不見東鄰少婦織錦工織作步障圍春風春風一去

花草歇金谷寒蛩怨秋月何如潔白長相守尊中有酒
為君壽人生溫飽不足多莫羨東家著綺羅

采蓮曲送越中吳本中

越江芙蓉開若雲越中兒女紅襦新年年采蓮江浦口
扁舟遙唱江南春凝情倚棹送行客折得芙蓉贈行色
南風吹作滿袖香令人別後長相憶君心如花不污泥
亭亭潔立當清漪花容不逐秋風老知君交態無榮衰
人生百年幾回別莫惜芳菲為君折芙蓉落盡秋江空

千里相思共明月

次韻酬高應文

曾向天涯釣六鰲
引帆風緊隔銀濤
江山有恨英雄老
天地無情雨露高
七國遊談厭犀首
十年奔走歎狐毛
爭如蓑笠秋江上
自鱸鱸魚買濁醪

和李別駕賞牡丹

絳羅密幄護風沙
莫遣牛酥污落花
蝶夢不知春已莫
鶴翎還似暖生霞
詩成金字懷仙客
手印紅脂出內家

獨羨沉香李供奉清平一曲度韶華

吳中會宋行之庫使時貢金北土

樓船曉泊蘇臺下官舍梅花暖欲開千里關河同客思
一川風雨送離杯黃金壓馬日邊去綠樹迎人天際來
後夜思君望天北使星應合近三台

同裕勒雅克明省郎

搖落關河萬木空征途日莫感飄蓬天寒為客吳江上
夜雨讀書山寺中伯樂何時過冀北揚雄謾自賦河東

黃塵冉冉貂裘老殊愧南鄰桑苧翁

送朱子昭赴都

西陵潮落船初發念子辭家去覓官直欲持書上光範
不妨賣藥過邯鄲黃河雪消水亂走紫禁花濃春尚寒
如此江山足行樂莫將塵土污儒冠

寄屠彥德并簡倪元鎮二首

水驛燈明漸掩扉雨中何處暮山微蕭蕭落木征帆過
漠漠長河一雁歸歲晚仲宣猶在旅年來伯玉自知非

久拚華髮添青鏡未許淄塵上素衣

故人今作祇陀客想見天寒尚倚樓
江海暮雲多舊友
關河夜雨有孤舟
桓榮學業仍稽古
李廣才名未得侯
何似雲林倪處士焚香清坐澹忘憂

送蘇伯脩參政之京兆尹任三首

日月垂光照海濱東南聲教

一作價

屬儒臣九天雨露金

甌重萬里山河玉燭新田垌年豐多

一作催

貢賦江湖秋

靜息風塵此行宣室須前席賸有嘉謨為上陳

上苑東風珂珮鳴
宮鶯初轉隔花聲
天清北口煙塵淨
雲去西山雨雪晴
畿甸居民瞻奉使
衣冠國子拜先生
漢家張趙何須數
待看臯夔致太平

天上神仙白玉京
煙花繚繞鳳皇城
端門日上紅雲動
太液春寒綠水生
封事曉當香案奏
奎星夜接泰階明
更看鼎鼎功成後
綠夜堂深遂素情

和趙承旨題岳王墓韻

莫向宗周

一作中原

歎黍離英雄生死係安危
內廷不

一作忽

下班師詔朔漠全歸大將旗父子一門甘仗節山河萬里竟分支孤臣猶有埋身地二帝遊魂更可悲

積雨書懷

曉來深院生寒思五月江城尚袂衣新水池塘魚暗長
溼雲樓閣燕低飛飄零王粲辭家久牢落潘郎感髮稀
却笑炎威都洗盡夜涼疎雨亂螢微

送徐方舟之岳陽

布帆高挂發吳歌巴陵到時秋思多涼風漸落君山木

明月正滿洞庭湖丈夫壯遊有如此人生清事能幾何
想見題詩搜景物夜深風雨泣湘娥

丁酉二月二日訪仲仁仲遠仲剛賢昆季別後
賦詩以謝

隱君家在越江邊煙雨江邨繞舜田玉樹郎君宜采服
紫荊兄弟正青年山雲曉閣讀書屋湖水春明載酒船
何日重來伏龍下參同契裏問神仙

子素先生客夏蓋湖上欲往見而未能因賦詩

用簡仲遠徵君同發一笑

夏蓋山前湖水平楊梅欲熟雨冥冥吳門亂後逢梅福
遼海來時識管寧野霧連邨迷豹隱江風吹浪送魚腥
伯陽舊有參同契好共雲孫講易經

寄裕勒雅克明省郎二首

十五明星近紫宮熏爐香裏珮玲瓏省郎趨幕皆時彥
元帥臨邊暫總戎黃閣風雲蓋盛世蒼生霖雨望羣公
當年禮樂三千字今日須看及物功

處士祠

一作湖

邊梅已放遙知載酒到巖阿西山煙靄連

朝好南省官曹暇日多詞客錦箋題水調佳人翠袖拂
雲和馬蹄歸踏黃昏月一路清香送玉珂

開元人物圖

憶昔開元有道時官僚濟濟盛威儀樓通華萼諸王過
仗入芙蓉百辟隨回首漁陽急輦鼓傷心劒閣駐旌旗
曲江廢苑重歸日舊日宮奴鬢亦絲

過達天山別駕所居

暨陽別駕真清官彈琴誦書民自安幽居恰一作却近范

蠡宅官舍政俯西施灘水聲入林竹根冷山雲落几香
爐寒有客打門求妙墨家僮莫放硯池乾

送張從善

四海張公子才華重縉紳蚤從樞府辟已踐屬車塵通
籍聯清禁嚴更列近臣周廬金帳曉巖室玉墀春馬潼
桐官酒熊軀少府珍青冥多雨露黃道煥星辰往事疑
皆夢浮名笑此身馮唐雖磊落顏駟竟逡巡歲月黃塵

老關河白髮新還家見江總舉事識陳遵春水桃花鰕
西風笠澤尊扁舟五湖客陽羨一歸人我惜交遊晚相
期意氣真冥鴻何杳杳斥鷃自趺趺斜日橫江路寒雲
隔水濱何時謀一壑卜築願相親

石門山

艤舟懸磴入蒼扉滿地秋雲冷溼衣萬古石門局不合
半空瀑布雪常飛猿收松子和煙落鶴伴琴童帶月歸
獨有謝公詩句好至今山色紀餘輝

題孟宗振惠麓小隱

宗振孟
后之裔

汴水東邊楊柳花
春風散入五侯家
繁華一去江南遠
閒汲山泉自煮茶

題柯敬仲竹石

珊瑚樹倚碧琅玕
曾入西清畫裏看
今日五雲仙閣遠
夢回煙雨楚江寒

莫春即事

楊柳樓前白鼻騮
金鞍被了喚名娃
重簾深處無風雨

肯信春寒瘦杏花

喜晴

刺桐花開山雨晴
綠樹上有黃鸝鳴
杖藜出門看山色
恰見小池新水生

題青山白雲圖

昨夜山中宿雨晴
白雲綠樹最分明
茅堂早起無他事
去看谿南新水生

此余往日在越中錄寄倪仲權之詩今十餘年矣意其不投之苦海則亦當供醬豢矣仲權乃裝潢為卷

快列之於諸名勝間矧當時事輻輳世方以斯文束
高閣而仲權於朋友之片言隻字亦無遺棄亦可見
其好尚之清交道之厚而不為世變所移者也惜也
予之學問名位視往日不少加進徒負故人期待之
意耳展卷一覽慨歎不已因書
於左方以自警云永嘉高明

吳克恭寅夫集

克恭字寅夫毘陵人好讀書以舉子業無益於學
遂力意古文其為詩體格古淡為時所稱翰林老
成皆與之交多游雲林及玉山至正壬辰斬黃寇
陷常州守吏望風奔潰未幾江浙平章定定來剋
復寅夫與趙君謨等俱以從逆伏誅嘉興張翼翔
南作忠徐倡詩有顧守臣鉅儒汗慙銜愧死莫懲
蓋指寅夫等而言也

道傍古墳

孤墳兩松樹風起秋陰暮日出沙草黃野煙白於霧斯
人蓋棺定長夜無由寤浮生竟何為陡覺傷馳驚二氣
積慘悽山川莽迴互何不學神僊翰飛飲朝露悲哉茂
陵骨曾為學仙誤

賦翟志道家三琴翟年五十九以青陽縣令引
年蓋高士也

翟公家三琴粲粲金玉微觀其記中語熟讀令人唏玉

徽落將家蹴踏當牀闌齟齬蛇蚶紋手澤自淮淝金徽

差小

闕

王生舊所遺生居湖山居檐檐者深衣憶別三

十年老大減腰圍又有墓中者才德婉而微其初來薛
氏斲者識雷威薛亦亂離得最後歸林扉公云皆我友
愛比玉與璣昔公為縣令寧棄笏與緋胡此獨不釋謂
是古音希我嘗聽公彈空齋坐忘飢松飈度落雪竹日
流清霏或時作龍吟華玉吼朝曦或時嶺猿叫夜磬空
霜飛或時呈瀏亮露鶴鳴江磯高情寄絕代妙在神氣



機感深動惻惻望洋見頽頽浮雲琵琶箏俗耳溷是非
藉此羅酒肉識者恒諷譏儻生盜跖粟寧死首陽薇周
公不可作孔子將安歸猗猗林下蘭庶草聯芬菲春天
不得佩歲晚還闕噦請公操此曲古道資憑依公坐默
不應面牆看蚍蜉

題白雲窗

白雲本無心廼生窗牖間崇朝寄所託日晏澹忘還竝
秀綠蘿雨餘潤紫芝田悠悠將無同翳翳還自然欲得

此中趣惟觀天際山獨想陶弘景令人心意閒

倚雲樓為至上人賦

至公好樓居揭以倚雲名雲虛不可倚直欲觀崢嶸
爾山中起油然石上生溼衣沾弱絮過角弄輕英最覺
凌霄迴還看暎日明逶迤成故事憑藉足高情懷哉虞
太史題詩為刻楹

見山亭為洞神宮主江濟川賦

本是江總宅晚為老氏宮軒豁此亭子樂哉同姓翁盤

礪青溪上睥睨白門東
雲林肅仙氣道德揚清風
見山便自好何必居山中
悠然今古意此事將無同

早行

溽雲斂徂暑陰火鍊金精
瞻彼河漢白林園風亦清
肅肅郊鴈翔嘒嘒山蜩鳴
吹笳者誰子三五柳邊城
城門一何高岐路百從衡
諒無楊朱泣悠然白首情

谷口歌采榮

谷口歌采榮松閒吹玉笙
如無此時興何處有高情
唐

虞讓天下巢許擅其名哀哉和氏璞獻者楚王城

草生可攬結

草生可攬結衣敝香不滅風吹古別離換我青青髮去
年往燕趙今年來吳越各自有情人鸞膏化為血

送黃秘書歸金華

作於張貞
居靈石鵑

秘書古壘洗金玉閒追琢寘之宗廟間乃復敦素樸科
詔昔求賢明經以為學君雖第三甲文氣已磅礴鳳毛
聯五色麟定峙一角于時日正中青冥翔寥廓迄今半

臺省往者俱館閣枚數盡英雄隱顯闕述作偉哉尚書
宋繼起秋天鶚一魁四海望旋復淒夜壑盛衰互絕續
天意豈厚薄吾子幸老翁掛冠彌矍鑠安車大江左杖
藜名山郭清言窮理窟私淑仰先覺況及大夫公生世
縻好爵述德紀豐碑山木工則度宛宛白下虹剡剡翠
螭爆無雙江夏姿豫章元祐脚清標溢素羽皦若離羣
鶴翕然萬里思芝草焉用啄不食固不飢風清九臯樂
回首漢廷偃倒行竟前卻疏廣非甚賢知止自寬綽僕

也猷畝中謳歌以耕鑿聞名三十載交誼欣所託鵬鷁
各棲飛萍蓬殊依泊天寒望古柏孤翠幾巉錯深期帝
子都仿像洞庭樂餘音今在無大雅其寂寞緬懷虞閣
老安問頗悠邈空花結翳業不療金篦膜滄江落日遠
一葦中流弱外史論文章譚君口諤諤語我盍賦詩持
贈勤有恪君家金華鄰冉冉僊意作神光運草木白石
俱起躍攤書石間帙洗觥松下酌生榮畢志願俯仰何
愧忤六經聖道微沿流到伊洛其文有蘊奧其義則博

約後生待來茲前輩已零落往往輕師說授受工標掠虛
辭相矜誇體認迷執捉君歸善自謀何以同槩矧詩教
本人心煩君曉粗略

東城行

東城俯春流余昔釣游地憶嘗拈落蘂相偎倚桃樹葉
底避游絲叢深納飛絮同時四五輩被服俱美麗千金
各自攜日暮恣遊戲但道長如此焉知老將至昨日尋
舊遊光景徒自媚日肆江海蹤漂零復誰記非無桃與

李寂寞千萬億

策馬出郭門

策馬出郭門杖劍歌載馳河水北洋洋太行東巍巍風
吹白日暝死者橫路岐傳聞多殺傷悲愴神魂飛心懷
丈夫諾手握千金資直前且不顧詎以禍福移人生貴
同類所哀獨流離迫此苦寒節悠悠僕夫飢下馬知馬
勞上馬憂馬遲雖不通馬語情事諒庶幾落日古戰場
往往令人悲豈意霄壤間我行今踐斯

丈人行

城門有丈人種瓜綠盈園瓜熟許鄰喫偷之竟不言歲
久都感激相期瓜蔓繁雖有困窮闕抱瓜瓜不寃近者
天稍旱羣兒走塞門請為救瓜活不憂井水渾深知丈
人德豈感使君恩忠信苟不偷風俗誠所敦嗟嗟復嗟
嗟敢為鄙夫論

寄陳衆仲供奉

騎馬都下歸放船湖中賞恩沾翰林制樂奏鳳池響十

年雨露間一日青冥上虞陳本同姓詞源浩沆漭他山
翠琰刻別殿黃金榜諸公誦合作觀者必抵掌昨聞已
超然近見益高爽宜乎盛名下傳寫日以廣漢史奏德
星君家太丘長餘音撫廟瑟致禮張賢網吾衰竟五十
所去輒尋丈雲瀑代春弦女蘿為夕幌誓挂牛角書婁
子鹿門往薄忝君子交幽期起遐想

客廣陵答天錫見貽韻

汎舟春風生江光颺雲藻人生杜牧遊柳色淮南道幸

欣韶芳媚孰云春事杪遠思極縣縣無緣是芳草

短衣

短衣荷長鑣晨起劖黃獨歸來讀道書日晏飢我腹羽
人丹砂牀遙知在澗谷松膏滴雲腴山房酒應熟

友人仕掾曹為上官所迫從賦此送歸

采蘭復采蘭綠葉何參差馨香滿懷袖持以遺所思恩
情中道絕此心當告誰願結青林佩悠哉白雲期石間
攬三秀學道倘因之

鶴皋辭贈張鍊師

吹笙王子晉鍊鼎茅初成
清秋金穴遊白羽雲中行
五煙隨露掌太霞乘火精
高歌落渺茫逸氣凌紫清
時飲玉池水朝餐珠樹英
追隨神雀舞低昂威鳳鳴
如何九皋上託子以修名

君子亭

二月姑蘇城繁花壓城樓
車騎相娛樂鼓吹間歌謳
玉山軒中意綠竹美且脩
澹然君子交戛擊應鳴球
風迴

雨光亂日薄雲氣浮頓令塵緣息竟與野性投當今顧
辟疆伊人王子猷撫膺諒云合散帙保遲留伐竿損漁
性接筒悲下流仰止清淨觀俯慙筋骨秋早哉澗間雀
暮色隱啾啾

碧梧翠竹堂分韻得帶字

長夏梧竹陰偃薄適所愛良朋四方至敘此承嘉會雅
意幾宿昔神交一傾蓋蓮芳玉山酒芹碧松湖菜風流
五侯鯖闕水郎官膾高郎雅耆宇郊生富清裁短李善

長談醫緩輒雅拜張顛矜道妙僧徹持醒戒歌喉間寶瑟舞影迴蘭旆題扇瓊英忽張筵翠屏對雜亂雖無次妍醜各有態良遊信所愜佳賞心亦快茲會安可期明當返予載回望玉山雲川長水如帶

題良常居士山居

良常標名山句曲主仙洞茅君倚翠麓白雲滿高棟上有巖棲士入山與雲共芝草鳥為耘桃紅鹿銜送茅君老兄弟夙昔勤學夢子獨擅為鄰幽深補其空風瓢懸

雅樂靈木分仙供息我山木陰懷人玉簫弄暫時苦勞
事非必能抱甕洗藥愛源泉掇英比朝饔歸靜其抱一
知尚亦殊衆鶴馭來何方尋君引余韉

題虞幼悅西郊草堂

因憶浣花杜陵老使我不樂懷成都張儀城外雪山立
玉女井邊春露濡邵菴先生家本蜀悅也草堂宜有圖
圖成奉公以為樂藉此名世何時無想公堂前風日腴
野梅官柳一株株縣官來問禮數熟閣老出游孫子扶

圖書琴瑟在左右游意

闕

澹天為徒新詩兼見公手蹟

讀者愛比驪龍珠公在西郊草堂裏神交自是才情美
江水娛人秋日暉雅音蕭條公老矣

秘書行送達秘監

天下學士聚鴻都老氏藏室仙為徒漢有石渠更天祿
貞觀人才顏與虞故事星躔木天壯東壁神光如寶珠
閣前芝草列五色慶雲湛露垂金鋪三皇五帝在時事
蓬萊道家之所無近者委蛇行秘書蜀人邵菴目力枯

迄今一代論制作先生合上明光趨二十龍頭還最貴
三十身冠名不孤敷歷中外復多載使預朝政恐所須
竊當留中贊帝謨奏列學者陳區區送酒況承光祿寺
進食何止步兵厨還思晝夜延青瑣莫問君王乞鑑湖

送牛彥伊湖南憲副

數歲情親託鄰里飲酒自放寧拘禮城中故舊四五人
與子不識何為喜前者較藝列春官今者薦名登御史
蒹葭蒼蒼白露盈鳳皇飄飄赤霄起衡山諸峰雲氣高

上有朱鳥飛嗷嗷
洞庭揚波瀟湘接
送子百丈江中艘
芙蓉此時開滿郊
繡衣握節巡江皋
荆潭倡和得從事
長沙幕府待俊髦
豈無他人我獨勞
自古陳力還吾曹
送曹德昭入掾中臺

孟秋高飈蕩焱熱
太白當頭暎佳月
天地始肅未乃登
長歌送君思激烈
青驄馬肥青芻秣
公子為郎亦材傑
臺端象賢重耳目
天邊北斗司喉舌
大夫抗禮丞相前
掾曹執法俱才賢
栖鳥在庭栢樹古
元氣旁礴雲蒼然

魯公葛萬方縣縣金鐘玉磬兩在縣快哉此行視京秩
清廟之瑟朱絲絃故人淪落江海邊為君一誦秋水篇
請君直上窮河源

寄曹德昭臺郎

昔子驅車往河甸河水迢迢不相見侍御驄馬昔揚鑣
郎君今年復為掾乍冬苦寒不可當子乃衰絰請太常
禮官封謚有褒卹賜碑撰刻皆文章名駒翩翩日千里
自是驂騑與駉駉范滂攬轡望澄清愛爾傳家尤更美

我宗門戶真淒涼四十五十年相將數奇命薄多輓軻
但恐失所纏風霜馮唐已老何由起駿茂不言幾失子
雄飛雌伏何足論目斷秋江送雙鯉

二月十九日登大茅峰夜宿元符宗壇因呈集
虛真人并閒遠潘尊師

大茅峰樓雲絕頂祠官石壇秋日冷杖藜蕭條一老翁
仲冬焚香謁司命日間流水俯潺湲妙意所得何能言
昔聞茲山直通蜀避世何必求桃源清晨躋攀歷深窈

下視諸宮樓觀小亂葉打頭風倒吹是日苦寒絕飛鳥
三君弟子老奉祠清淨寡欲真吾師清酒綠液半凝脂
慰我遠來還渴飢閒遠先生更竒古壁間示我虞翁詩
詩中愛道李太白結巢雲松復此客九江秀色雖可餐
高隱何如煉精魄吾聞茲山到處有神仙楊許遺書儻
可傳泥丸絳官朝內景玉經玄文味至言如此亦足昌
吾年

送龍翔俊用章住吳白馬寺

白馬吳中寺袈裟建業船
黃花季秋月錦樹大江煙
洗鉢胡僧飯馱經漢帝年
何時虎丘石共論永明禪

送鄉人錢明之赴閩閩掾

仗節開閩閩分曹傍省闡
用人那有外觀海更無涯
白露收柑子南風食荔枝
未須頻會面多寄府中詩

送卓御史移西臺

漢節楚江東堂堂御史公
秦山指太白胡馬驟青驄
光暎長安月涼生建業風
冥鴻有高羽多在柏臺中



送湯生茂才歸宛陵

春舟度鶴背晨鼓發龍灣
軟語勞相接幽期任獨還
風清建業渚雲白敬亭山
自有府公薦慙無遊子顏

春夏承湖南僉憲兀顏子中問訊敬用酬上

有客湖南去聞公憲節新
坐霑梅子雨憶別柳條春
衡岳瞻朱鳥湘江詠綠蘋
升車訪遺逸問俗願清淳

寄柯博士

柯侯五雲吏自號丹丘生
先皇御宸極高閣詠文明
羽

蓋橋山集彩舟江上行蘇州韋刺史那獨擅才名

三月十日與薩天錫錄事遊京口城南小寺忽
虞伯生秘監寄薩詩用韻呈席上

不見秘書久憶公清且閒看詩野殿側把酒春林間因
送碧鵝使相過黃鶴山遙憐西閣侍文采映珊珊

寄薩天錫時居福建憲幕

春日江南郡懷人杜若生烏啼建業樹客在福州城桂
酒銀壺重華裾玉佩清題詩幕中罷應得動高情

寄題剪韭亭

園有幽亭趣題之剪韭名老夫無長物止客總高情
脆碧含風斷輕黃帶雨烹相過乳餅白還愛酒壺清

湖光山色樓

智仁予所樂平湖仍對山神交魚鳥外興移蒲柳間
雲捲幔入落日櫂歌還望海躡星影秋槎來碧灣

送沙子中經歷建寧

武夷蒼蒼春日黃山行兜子陟炎荒故人右榜多通顯

清廟遺音獨渺茫
官堠綠林穿荔子
人家餉客食檳榔
兼之此地多書籍
公退牙籤日幾行

送友生

一作唐漢卿

春風顛狂復細微
吹波蕩槳動人衣
野桃葉小流鶯至
官柳條長江鱗一作紫肥
稍別未嫌頻作惡
相逢自識固

應稀腐儒竊祿真何補
望望

一作回首

滄洲白石磯

城邊柳條

城邊柳條春意動
近者力至復低垂
須令傍水留披拂

不獨撩人管別離過月即看鄰綺樹卜巢還許借黃鸝
荒州物色猶如此若在御溝應更奇

達兼善除秘書監未上而有侍郎之命賦詩奉

送

雖年海內龍頭客蚤負詞場一世豪秘監稍遷為學士
侍郎即去重儀曹到京騎從看花藥過閣朝迴拾鳳毛
開憶玉堂何處所青春白日見揮毫

陽羨茶

南岳高僧開道場陽羨貢茶傳四方蛇銜事載風土記
客寄手題春雨香故人惠泉龍虎感吾兄紫筍鴻鴈行
安得茅齋傍青壁松風石鼎夜聯牀

簡陳漢卿郎官

荒土城邊草樹鄰荷君詩語數相親交游豈謂尋常輩
耆舊都無四五人才比阮生誰放曠賦傳庾信最清新
愁深江燕銜泥急偶汚牀書不忍嗔

過義興周將軍廟

陽羨溪邊孝侯廟陸機

一作平原

文字右軍書借

一作憶

從名

士傳家後誰謂將軍亡國餘蛟虎于今正狼籍

一作滿道路

鳳麟不見謾款款

一作山川自昔好丘墟

陰陰棟

一作長松祠

宇多松

檜

一作清風在

凝欲臨流卜隱

一作卜比鄰葦舊

居

懷杭州李二尹

蘭省故人何寂寞柴門今雨獨徘徊老夫老向愁邊去

春日春從病裏來王粲空傳鄴下詠山公不復習池回

篋中書疏愁俱積忽到思君一屢開

贈曹仲普

學省花陰覆苑牆
鶯啼曙色暎蒼蒼
翁今拜秩少宗伯
樂奏春官新太常
通陞起居同典禮
侍臣子弟合為郎
扁舟道別江城暮
琴瑟朱絃思渺茫

問郭君錫病

向宿丹陽舊草堂
暎人嘉樹憶相將
階前蕙葉幾多碧
江上柳條無數長
不礙得書成卧病
遙知裹藥自聞香
來時許我青松障
莫遣雲山墮渺茫

惠山泉

九龍之峰秀蜿蜒玉漿迸出為寒泉來歸石井僧分汲
流入草堂吾獨憐暗滴洞中雲細細冷穿池上月娟娟
闕乞茶經與水記俟余歲晚奉周旋

送達天山應奉北上

國中太史浙河遊碧樹風生紫綺裘蜀郡奉祠揚子老
漢廷召對賈生優金盤芍藥還相詠翠籠櫻桃亦易求
幸得草堂同晚飯少陪高論借遲留

懷陳漢卿從事

兩江故人蹤跡疎
汾水牛郎能遺書
青鏡時時傷往事
素絲日日看新梳
簾穿迸樹攢雲氣
扇接飛花下雨餘
爾亦官居古道院
一春情思竟何如

薛常州端午雅製

端午宮詞進閣門
侍臣應得忝芳樽
御羅畫扇金花細
筓繭朱絲玉臂溫
太子題詩成故事
前朝報國荷殘恩
更求醫士三年艾
攜向壺冰炷月魂

送陳衆仲

西閣梧桐安鳳巢羽儀五色異凡毛
往時學省文名重
今代詞林王氣高
春到御溝生綠水
地連宮柳間紅桃
老去相如少詞賦
頌聲轉擬屬王褒

至正九年四月二十日元璞舟過江郊枉勞衰
疾承近懷多慰元璞言歸賦七言近體一通問
訊遙寄玉山主人

玉山長夏草堂幽
老愛從君十日留
醉語支離歡不記

歸來爛漫憶相求
風迴柳葉搖歌扇
月出荷花暎綵舟
可念江湖搔白首
還將衰朽問湯休

賦少尹迺元臣為東平郡王之諸孫求詩

聖歷開文運
王章定武功
大人推部落
開府冠山東
日月旂常異
河山帶礪同
諸孫傳赤舄
小雅播彤弓
一命起居注
載趨長樂宮
掖庭官濟濟
淮浙賦中中
竊忌徵求急
方來福祿崇
翱翔鸞鳳日
逆順馬牛風
帝力生成大
人心灌溉公
共圖歌政理
多稼答年豐

送張中丞之官翰林

中丞獻納道如何內相絲綸寵莫過槐閣地聯文石陞
杏園春滿曲江波陰陰雨露深青瑣箇箇星辰溼絳河
花藥隔簫宮漏近柳條當戶曉鶯多中官送酒青絲絡
上苑乘驄白玉珂豈獨寸心圖補報要須元首及賡歌
太常禮樂還相問閣老才名迴不磨通國此時同悵望
憶公何處最委蛇黿峰巨石森蓬島香殿微風拂御羅
延祐得賢俱第一野人白首關林阿

橫塘曲

妾家住橫塘綠水映垂楊五月南風起荷花似藕香

唐宮詠

闌草賭珠襦穿花提玉壺東頭老供奉好似執金吾

蜨

失意穿羅袖綠情戀繡牀妒遺衣上粉狂覓酒邊香

蓮葉何田田

蓮葉何田田田生綠波明朝大如蓋風吹將奈何

草生磐石上二首

草生磐石上根深石不露水流磐石間風吹下山去
草生磐石上似許行人坐水流磐石間不許行人過

春日

映日含風白苧衣香飄晴雪弄春暉故人騎馬不相識
蛺蝶自來衣上飛

偶成

船落黃泥與白沙春光都在棠梨花蜜蜂相喧作何語

日晚松陰報午衙

陶巨川歸養

雁過秋霜落滿衣
數聲相近白雲飛
寄書莫送潯陽鮓
采石江頭魚最肥

寄石民瞻

礪泉堂上白鬢翁
苦憶雲山杖屨同
秋到黃花無幾日
人生只合酒杯中

題元暉山水

江上江雲漠漠寒有時帶雨過層巒只愁海岳蒼前路
水沒黃沙鴨觜灘

陳方孤蓬倦客橐

方字子貞自號孤蓬倦客京口人赴省試來吳元帥王某招致賓席因寓吳焉龔提舉璠以女妻之鄭提學元祐輩皆樂與游晚主無錫華氏家塾其詩如門前灌木春啼鳥屋畔長松夜宿雲天寒客裏輕相別花落孤邨喜獨來隨事感發鍛鍊最工嘗手鈔杜詩朱書小字夾注其說如對起對結散起散結或某句應某字或某意發某語脈絡枝葉

一一究心吳人為刻方詩行世後不知所終

題割股老女卷

蜂蠆螫我手阿譽須動色如何割股女引刀不愛惜見
父不見肉視股如視石眼前秦越人區區較肥瘠

天平山

東吳水為州西山茲獨秀上有百歲松下有千尺溜况
當泉石間野花亂如繡頓足忘僕勞長歌發余陋沈沈
范公祠肅肅香火舊碑猶輦洛時寺當風雨後烏乎一

代尊廟食今誰守寂寞壯士懷松風動清晝

靈巖山

客吳十五載始上靈巖山入門地如削憑軒絕躋攀孰
云念鄉國不復憂險艱回首楚與越茫茫一氣間向來
朝會時自謂吞百蠻焉知王氣衰空忝禪棲閒山川自
瀟灑木石饒爛斑俛仰萬里外浩歌風雨還

羊腸嶺

迢迢羊腸北山深日當午道傍多奇石百態不受侮高

或如飛龍低或如踞虎岌業積鐵間參差意無迂僕夫
如怪我疾行齊過弩息息莫辭勞悄悄愧不羽野果綴微
殷春泉流亂乳焉知下山時淒迷更何許

涵虛閣

高標何崔嵬結構蒼崖上羣山如兒孫羅列皆北向勢
入五湖小氣敵萬夫壯想當全勝時自足恃保障登之
尚心懷却倚獨惆悵遠近互出沒風靄相摩盪草木亂
如雲乾坤悄孤望矯手不成翔無從挽塵鞅

題宣和所製赤駒圖

房星委地生神

闕

衆馬不得相倚匹千里風輕白玉蹄

平淵春浴丹砂質自從長養入天閑振鬣常陪乘輿出

未知赴敵見戈矛所慣承恩聞警蹕嘶當落日近尊嚴

氣抹長林動蕭瑟不慚芻豆飽微軀尚覲朝家三品秩

宣和殿裏圖書

闕

親見圉人事爬櫛當時青海九萬餘

未有一匹當宸筆臨軒睥睨迴出羣落紙須臾歛奔逸

內侍傳宣賜近臣再拜奎光欲騰室秋深沙苑多蒺藜

夜半河南吹麝栗已詔民間置牧地如此龍媒敢輕失
青城道上塵眯人六宮粉黛無精神此時此馬

闕

不能追隨天子向南去哀哉委骨俱蒙塵

題龔翠巖中山出游圖

楚龔曾中墨如水零落江南髮垂耳文章汗馬兩無功
痛哭乾坤遽如此恨翁不到天子傍陰風颯颯無輝光
翁也有筆同干將貌取羣怪驅不祥是心頗與馗相似
故遣麾斥如翁意不然異狀吾將憎區區白日胡為至

嗟哉咸淳人不識夜夜宮中吹玉笛

雲林生惠山圖次元韻

佳樹陰森欲礙空畫成夜落鐙花紅絕憐帶經自鋤者
未忍竟別天垂翁汾河春雲散高柳湘水微茫綠於酒
翁歸天末見青山臨風莫負揮絃手

至正五年三月八日玄素先生來林下瓚乃賦詩曰
吳淞江水春映空浪波沄沄霞映紅耕田鑿井居其
左令我長懷甫里翁夢見維舟江畔柳剝啄敲門散
杯酒整冠起接平生歡石逕蘭芳重攜手雨後共行
林下正見惠山先生命瓚寫之畫訖因書此詩
於上張外史陳先生見之必大笑也倪瓚記

洞虛宮

真館時時到仙花樹樹幽西風寒入竹北斗夜當樓頗
覺乾坤異寧為歲月幽乞分筇竹好相伴赤松遊

寄王仲升

一作叔

陌上誰家子行春竝騎來揮鞭不相問回顧復疑猜二
月初消雪東風尚落梅更尋禪寂地石上翫蒼苔

清閼閣

湘簾半捲雲當戶野鶴一聲風滿林纔立簾紋波細細

又疑牆影雪陰陰竹搖槩几常開帙花落藜牀獨抱琴
不謂世間仍得此恍然飛屨駐仙岑

新正獨坐

柳葉參差蘭葉長西鄰春酒鬱金香吾生不飲唯搔首
此物多情故惱腸髮已鏡添新歲白書仍筆點舊時黃
向人節序年年異來往猶煩禮數忙

送蔡霞外

不見道人今四載疎狂猶似舊時多自言曾到神仙宅

公亦須吟離別歌
澗草陰陰披紫藟
山花細細落青蘿
只愁骨相無清氣
赤水玄珠奈爾何

寄開元和尚

娑羅室內早春初
經卷香花禮佛餘
終日更談言外法
十年不寄蜀中書
夜深雪殿當空白
月落風樓近竹虛
若得為吾留一榻
韋郎詩句豈容疎

元宵留無錫有感

曾聞故老說前朝
今在殊方度此宵
月殿不催春賜酒

風檐空憶夜吹簫已無花影如雲起那有香塵作霧飄
滿眼疎狂何所去青松接屋自蕭條

就王季賢省父簡孫子翼處士

吾廬歷歷楚江邊子渡江時暫泊船須問垣牆仍好在
莫教風雨轉淒然夢成蝴蝶隨春去愁斷麒麟竝冢眠
若見孫登還一笑餘聲散入薜蘿煙

送覺上人謁龍翔錄寄子異

偶逢吳下鄭居士手把新詩就我吟紙上姓名無俗氣

篇中律呂有遺音
鮫人淚落金盤冷
木客歌傳石磴陰
謄寫已堪驚
老眼龍翔一宿會
知心

王季野由鎮江過揚州省覲父尚書以送

楚楚斑衣照暮春
蒲帆帶雨出西津
樹迷瓜步青如薺
江漾蕪城白似銀
久謂尚書安寢少
不勝天子寵榮新
暫時定省加懽懌
枉使吹簫送客頻

早冬過笠澤漁隱

方塘如鑑石如峰
落葉平蕪覆一重
雲作晚陰低薜荔

水涵秋色亂芙蓉黃冠道士松間過白雪漁翁月下逢
尚想天隨無俗伴應攜茶竈與從容

遊慧山

僧居高處接雲霞邨市周遭石逕斜細細山泉爭入澗
雙雙谿鳥淨眠沙佛前風動杪樺樹溪上春留躑躅花
十五年來頭漸白倚欄仍舊一烏紗

題迂翁安處齋圖

睡起山齋渴思長呼童煎茗滌枯腸軟塵落碾龍團綠

活水翻鎗蟹眼黃耳底雷鳴輕著韻鼻邊風過細聞香
一甌洗得雙瞳豁飽玩茗谿雲水鄉

華彥清登常州玄妙閣有詩因同韻

地接三吳口人操衆楚音樹迷晴漠漠花亂夕森森碧
是當時血春非往日心翻思當矢石猶暇惜冠簪丞相
戈如雪將軍志比金倉皇驚破竹踴躍念披襟壞堞仍
存舊高標獨峙今星河垂綺戶雲霧出琪林鳥去蒼茫
閣帆歸迤邐深諸天欣共賞勝地肅同臨突兀連雄棟

依微隔遠岑紫霄傳廣樂白日闕層陰倒影何多美空
歌試一吟悠悠江海興冉冉市塵侵

呈王本齋尚書

聖主光先業王春再至元贊襄符妙算擇選副深論衆
悉推耆德三曾鎮大藩虎珠秋月避鳥幟海雲翻籍籍
番禺頌明明造化恩清標非柏府高秩是薇垣煮海民
為食經營古所敦於淮邦足賦浩汙利之源弊政思張
弛長材畀輕軒光芒分八座精采送孤騫鼎重千鈞小

膠清萬丈渾龍文須御服馬漣錫壺尊香散知心醉春

回到骨溫冰霜愁左

闕

風雨命前奔竈竈連雲起船船

附蟻屯絕知忘夙夜何暇覓饗飧昔也東西浙歡然遠

近言市無憂折閱人不困牢盆公日唯扃戶方時亦在

門從容嘗接語歎息每銷魂裋褐

闕

如鬼傳餐首欲髡

潮乾晴沫白日淡莫煙昏卒戌春鳴柝人家月照樊鹵

成俱井井地限各邨邨碧海浮天際黃芽暗竹根緬思

多彷彿已閱十寒暄識量今逾老聲華晚更尊謬知慚

骖馵甚欲寫璵璠形弔徒蕭瑟心馳正鬱煩仙花團雪淨
江草亂雲繁早晚招漁艇丘墟問故園樞衣瞻管仲掃
榻寄陳蕃袍笏仍圖畫山林數記存此時鷗與鷺隨意
樂乾坤

送蕭天祥為蕭山縣學官

儒官已在羣僚底南士尤嗟一介微目送青冥何漠漠
手循華髮尚依依匡衡未老頤堪解阮籍多窮淚可揮
雁塔近從秋草沒鷄林遠傍暮桑飛人皆雞口喧爭利

子獨鼇頭坐失機寂寞宮牆悲傳舍荒蕪禮樂見深衣
諸生載酒同題句賢宰鳴琴共按徽綠樹雲回神禹下
白蘋風起孝娥歸門當越嶺春橫闕地接江潮夜撼扉
定與王郎招爽氣復陪賀監倚斜暉登臨闕轉怱怱過
勝絕寧教草草違端欲早收櫂與桷祇愁空老故山薇

琴臺

蘚暈陂陲碧沙痕突兀孤無僧依石坐有鬼隔雲呼

硯池

湛湛冷山骨幽幽抱日光
曉吟看雨氣春供汲花香

白雲泉

泉在白雲裏雲深泉更深
豈無千尺綆空立萬松陰

題趙子固蘭蕙圖

光風汎汎透晴沙見此萎蕤一寸花
可是湘濱高數尺不將墨汁代春芽

再題趙子固蘭蕙卷二首

雪消雲淨墨池方愛殺窓前葉葉長
祇為朝東春得早

風吹一夜紫苞香

右蘭

無數花開一兩枝更栽百畝亦相宜江南三月春如酒

惱亂蜂兒總不知

右蕙

題本齋王公孝感白華圖卷

蓼莪霜氣入袈裟銘筆當歸學士家更為白華添後傳
東風誰忍看山茶

卧雲書院

春盡范公祠下路山雲漠漠水泠泠不知無數長松樹

若箇根邊有茯苓

和曹克明都事靈巖二絕

金屋妝成貯禍基
君王猶自苦沈迷
百花洲上西風急
唯有寒蕪一尺齊

門外長松可十圍
松根下有茯苓肥
一雙啼鳥忽飛去
却是老僧來挂衣

宿金井塢內

馬家巷裏水西頭
樹樹垂楊可繫舟
却趁楊花飛過嶺

向人行處不能休

留福壽菴小飲

主人能歌客能飲
飲罷清泉清渴吻
醉起不知風力高
夜半松花落香粉

潘純子素集

純字子素廬州合肥人風度高遠壯游京師名公
卿爭延致之每宴集談笑傾座輒云潘君不在令
人無歡嘗著輓卦以諷切當世其初六辭曰出門
便輓又何咎也其上六曰以輓受爵亦不足敬也
或以達於文宗目為滑稽士欲繫治之因亡走江
湖間晚居淮淝後為行臺御史大夫納琳子安安
所殺子素喜為令樂府與冷齋疎齋相為左右歌

詩秀麗清郁後生輩竊詠之以謂義山飛卿殆不能過也其弔岳武穆一篇尤為一時傳誦

題伯修春風亭

青陽動微和條條原上來
綠池解輕冰芳庭散香埃
粲粲桃李花照耀初日開
永懷亭中人春服宜新裁

秋日陪杜徵君李先生游金華山

輕雲澹秋色涼日靜琳宮
水落白石上人行深樹中
悠悠坐長嘯肅肅來清風
仙人不可見芳草碧叢叢

題巾子山房僧舍

清江抱禪栖山頂在屋下朝霞生庭戶老樹立石罅日

出漁舟集日入市賈罷僧子獨何為長年一作道遥事閒暇

送杭州經歷李全初代歸

東家老人語且悲衰年却憶垂髫時王師百萬若過客

青蓋夜出民不知巷南巷北癡兒女把臂牽衣學番語

高樓急管酒旗風小院新聲杏花雨比來官長能相憐

民間蛺蝶飛青錢黃金白壁一作馱西馬明珠紫

貝翰南

一作西洋

船繁華消歇如翻掌宮中賦斂年年長里

巷蕭條去

一作竟

不歸華屋

一作花戶

重門結蛛網語中

一作終

嗚咽不欲

一作堪

聞道傍狼

一作餓

虎方紛紜麒麟鳳皇那

復得使我益重髯叅軍在官近

一作僅

一考素髮蕭蕭坐

成老上官掣肘下吏罵賴有閭閻獨稱好杭州公事天

下繁大才處

一作取

決無留難叅軍累官日益貴何術可

使斯民安

桐華煙為吳國良賦

嘗聞吳剛上天去手斫嫦娥宮裏樹調向人間作散仙
陽羨州中水邊住曾見玉兔杵玄霜三生悟得燒墨方
墨成得錢即酤酒那知世有白玉堂百年生計萬慮息
身不求知名四集卧吹長笛看青天歲掃桐煙三百石
周郎昔斲長橋蛟腹中有白凝為膏石牀煥傾玉髓滑
竹屋夜擣山月高江南李墨人共惜安得令人不如昔
君看鬱鬱歙州山山上青松盡千尺

復龍洲先生墓

夷門王氣橫江來秋風落盡梁宮槐鳳凰山頭駐青蓋
海門樓閣空中開五國城荒雪如席寒擁旃裘兩宮泣
帛書不繫鴈南飛衰草黃雲澹無色君臣自謂虞重華
不識何如司馬家鳳笙龍管將進酒玉闌羯鼓方催花
白頭遺老空惆悵鐵鎖長江幸無恙獄中誰掾岳將軍
人間知有秦丞相搢紳之士皆汗顏山林氣壓居庸關
那知義膽忠肝者弗在貂蟬玉佩間何人好事高千古
愛此淳風似鄒魯咸陽寂寞漢諸陵慚愧劉郎一杯土

山行即事

石子路三义居人八九家綠分鄰寺竹紅出矮牆

一作短籬

花野老能娛客山泉自煮茶茜裘誰氏子

一作女

赤脚髻

雙丫

題蘇伯修滋溪書堂

華屋書充棟清溪樹拂檐波光浮藻井雲影亂牙籤四

世風流在諸生禮數嚴歸來謝賓客長日下疎簾

送杜元父赴南臺掾

故國江山在行臺地望優顧瞻烏亦好却憶鳳曾游寺

影清溪

一作河

曉蟬聲玉樹秋郎官多古意莫上最高樓

題豫章楊季子水北山房

舊聞楊季子水北有山房竹色長年綠松陰五

一作月
憲六

涼雨絲深釣渚風帙散

一作亂

書牀亦欲相從去江波不

可航

送路吏張蒼麓又別號養晦

徇國忠烈
王諸孫

寂寞麒麟閣浮沈鴈驚行已聞書上考猶

一作應

不負前

王古井宮槐冷空山海檜長歸心似潮水日日向

一作問

錢塘

題劉高州國初運糧文卷後

帝室經營始高州饋餉

一作運

多猶存數紙在已是百年

過勲業麒麟閣英雄勅勒歌漢廷功第一只合數蕭何

題張先生良常草堂五言一首

每愛草堂幽來為竟日留獨當山一面更近水西頭繞
舍栽青竹開窗看白鷗拾遺茅屋好不得近鄜州

題周公瑾墓

伯符早世將軍死，鄴下羣臣賀魏公。
石馬荒涼眠道左，紫髯倉卒帝江東。
二喬信是傾城色，甲第空規建業宮。
百尺孤墳蓋春草，遠林寒食紙錢風。

題岳武穆王墳二首

海門寒日澹無暉，偃月堂深晝玉。
一作漏稀萬竈貌貅江

上老兩宮環珮夢，中歸內園羯鼓催。
花發小殿珠簾看，雪飛不道帳前胡旋舞。
有人行酒著青衣。

此首光岳英華作蕭字

湖水春來

一作年年

自綠波空林人迹少經過夜寒石馬嘶

風雨日落山精泣薜蘿江左長城真自壞鄴中明月竟

誰歌惟

一作空

餘滿地萋弘血草色年深碧更多

此首文翰類選

大成作

張惟庸

送顧仲父赴廣東市舶提舉

合浦明珠久不還使君風采動羣蠻
鮫人把臂來城裏荔子堆紅出坐間
江映蕉花鸚鵡綠雨昏榕樹鷓鴣斑
昔年駿馬經行處父老那知得重攀

送海東之西省出戍

窮猿憑險弄干戈五月樓船奏凱歌自古蠻夸多反側
只今州縣重差科漢家循吏文翁少亮府謀臣馬謖多
莫道鮫人居水底海中曾見不揚波

送張仲舉赴金陵郡學博

攻苦食貧三十年才名不讓古人先一經遠赴招賢幣
千里寒移坐客氈書擔曉爭京口渡布帆春上石頭船
秣陵秋色秦淮月夜夜吳山几案前

秋日與仲遠昆季

涵暉軒下重經過
愛客情懷久更多
晴日上簾分竹色
晚風移席近鷗波
相看把酒賢兄弟
却憶題詩老季和
頭白校書天祿閣
無由共飲恨如何

題顧周道畫濯足圖

脫屣白石上濯足
清泉中悠然天際想
木末生微風

題仲穆看雲圖

行憩蒼石上坐愛青松陰
白雲在天際相對總無心

送金溪道士南歸

南州高士芰荷衣，賣藥都門盡不知。
手種谿頭千樹杏，花開正是到家時。

送諸葛子熙關中打碑

漢苑秦宮生綠蕪，斷碑殘刻墨模糊。
應從三峽浮船下，欲問君家八陣圖。

題宋高宗二劉妃圖

秋風落盡故宮槐，江上芙蓉並蒂開。
留得君王不歸去，

鳳皇山下起樓臺

題趙子固蕙花蛺蝶圖

江上青山日欲晡
幽花小紙墨模糊
華清宮殿生秋草
零落滕王蛺蝶圖

題王若水幽禽圖

花間幽鳥愛幽棲
揀得春風最好枝
只有江南王若水
白頭描寫似徐熙

贈歌者杜氏入道三首

金 卷十一
夜涼瑤珮玉丁東月下焚香禮碧空願逐吹笙王子晉
竝騎丹鳳彩雲中

簾壓濃寒晝掩門沈香火煥澹氤氲舊時衫子渾無用
剪作仙家百衲褌

雲髻高梳鬢不分掃除虛室事元君新糊白紙屏風上
盡畫蓬萊五色雲

此首見楊維禎
西湖竹枝集

曹知白吳淞山色圖

一片吳淞江上秋澹雲涼葉思悠悠何時蓴菜鱸魚膾

却向先生畫裏游

鄭東聯璧集

東字季明號杲齋溫之平陽人幼酷嗜書明春秋
再踐場屋不合主司程度遂棄去游泚河之左右
大肆其力於古文辭日試萬言衮衮不休歐陽文
公立竒其材欲剡薦之會疾作而卒弟采文名相
埒元季兵亂遺文零落采子思先合寫成書釐為
一十四卷題曰鄭氏聯璧集宋漁序之曰杲齋之
文氣質沈雄如老將帥師旌旗金鼓繽紛交錯咸

歸節度曲全之文規製峻整如齊魯大儒衣冠偉
然出言不煩曲盡情意然皆有臺閣弘麗之觀而
無山林枯槁之氣文憲斯言深得二鄭之旨趣矣
題朱澤民秋江獨釣圖

山川無微雲萬物榮可數長江秋氣至美人在中渚涼
風吹蘭舟木葉下如雨魴鯉豈必多書卷良可咀初非
與世殊聊以樂空屢

贈筆生陳仲實

吳興老馮善擇毫擇毫入筆銛於刀近年楊陸亦有法
聲價直與馮齊高陳生後出奄三子射利肯作傭工餐
欣然為我開一束詎數豕鬣并狸毛纔濡入手即圓熟
揮洒不覺運腕勞野人得此殊快意翰墨雖拙尤便操
既不能寫蟲魚疏又不喜書龍虎韜暮年但欲給生筆
收拾遺史明誅褒顧無好句相報答且復浮以尊中醪
氣酣耳熱秋風起江山如助詩人豪

送駙馬西山公詩

明侯德美世莫儔麒麟之趾丹鳳味黃流芬芳在尊卣

縑藉光彩收琳球王姬下嫁禮服優璫金為車白玉輶

閨中通籍孰與侔貴宜列爵同徹侯大布遂易狐白裘

事業直擬追前修賦詩援筆思不留天機豈用加雕鏤

衆觀后羿親射侯束手欲立江輒流法書一字千金酬

玉釵之股珊瑚鈎大儒老師日與遊論道極口稱伊周

二年市官留小州政寬坐致東南酋三韓毛人及流求

行滕在股寶絡頭長風萬里驅大艘犀象珠貝充海陬

貢之府庫常汗牛歸視其室唯荆綬聖主在位將爾求
出納王命為舌喉

題畫山水歌

君不見謝康樂短面長髯瘦如鶴作郡安能棄丘壑又
不見鵝夷子屬鏤蜚霜赤心死一棹三江入煙雨我生
千載下酷愛古人心本野老仙縮地誰得傳顛墨淋漓
醉中洒幽幽樹意暝含雨朵朵山頭青欲雲橫杠依約
度深谷三里五里東西鄰采芝定有商顏叟鹿皮之裘

槲葉裙神仙有無不可即杳杳路斷桃花津何人相期
過西麓牲肥酒熟秋樂神祇知畊鋤及婚嫁廟堂黜陟
那得聞扁舟從何來盈盈載秋碧嵐光忽已陰日暮問
家室熒熒林隙鐙火青雞黍家人具今夕終南相繼售
卑價才薄官微遭筆罵久知富貴成茹荼吾獨愛山如
食蔗家貧恰有買屐錢白髮漁郎許船借箕山潁曲命
吾駕百歲胡為墮機獲

題畫松壁

八月江頭茅屋破日日盲風雨交和眼前安得大厦成
拾遺歸來淚空墮紛紛萬木爭出山瑣碎榱桷非為難
萬牛莫挽梗與楠往往棄置丘壑間獨立風霜二千尺
未識何時逢匠石白頭老樵空歎息

老牧圖

彼軒彼裳我笠我蓑彼馳且驅我行且歌嗚呼世間榮
辱如吾何夕陽牛背青山多

送江陰郡博周元浩歸平陽

君不見蘇秦昔上秦王書
嬖不下機妻不炊青鐙長夜
股流血黃金六印何累累
又不見陶淵明富貴視之鴻
毛輕腰寧不折五斗米歸來
籬菊秋盈盈周君妙年江海
客幾度吳花醉中摘蒲帆半
幅風颼颼長嘯一聲江月白
我家亦在蒲海頭此時春酒
濃如油堪憐千里尚飄泊恨
不共買東歸舟

今日行

昨日去今日來明日忽忽復
相催百川赴海何時迴思

之竟不令人哀傳聞三神山海水青如苔五雲零亂開
樓臺中有長生不死藥仙人青髮紅玉腮此事不許人
間有錢鏐古人骨亦朽骨亦朽勸君酒長使金杯在君
手

昆城吳歌

昆城吳水三萬頃吳兒招我入溟涬舉頭看月月在頂
手弄荷花落天影酒酣起就船底眠青天作衾毛骨冷
龍女欲出聽我歌扇以涼颼吹夢醒初歌音簇含清勻

忽然疾走銜枚軍百怪髮立皆驚奔龍女舞翻巫峽雲
再歌壯以悲鳳皇背泣麟洲啼六月雪壓崑崙低我歌
三發滄海裂綠水欲變黃塵熱龍女聞之悲哽咽旌旗
忽動龍女歸金烏飛上若木枝暑炎如火炙我肌嗟我
老病力莫支千金莫致南海犀沉書問龍女遺我蒼水
壁與君乞取半湖白歸向高堂挂空壁

仲雍墓

野鼠穿黃穴遺封百草深死無歸國夢人識逸民心
繼

樹冬逾碧江猿夜亦吟海虞山上月梅里共沈沈

齊女墓

突死孤墳在千年恨尚新荆蠻非偶國盤瓠媿吾人躑
躑春啼血狐狸夜得鄰營丘無霸業吳沼更傷神

寄郭義仲

憶君持酒別初月出東城溪艇幾時到春潮日夜生白
沙眠翡翠青竹下鷓鴣遙想汪徵士題詩慰逸情

題余生山居

野水流花澗春雲拂草亭地連桐柏觀人識少微星養
鶴還知相煎茶亦著經卜隣應未晚休勒北山銘

贈呂一相者

男子始墮地百年那可量買臣歸作郡顏駟老為郎得
路青雲表垂綸野水傍持杯勸君飲吾意正茫茫

和郭義仲

每愛揚雄能作賦不憂賈誼易遭讒蒼鷹拂拭黃金鉞
駿馬光明白玉銜太乙頻來觀象帙麻姑相許寄銀槎

獨媿名才難並立見稱龍尾也非凡

寄呈梁承旨

太平天子重詞臣色爛官袍寵澤新
應對金鑾明日月步趨玉署上星辰
夜分執笏傳宣急晝永揮毫草詔頻
自媿不才頭已白秋風垂釣大江濱

九龍山懷友

風雨兩鄉難縮地小窓時讀去年詩
九龍何處雲深淺一鴈不來人別離
老樹引藤秋結子黃猿窺果晝呼兒

遙知句就無人解月落山靈墮淚時

送郭彥昭歸吳中

外沙沙頭潮沒渚海壇廟前唱蠻歌政喜南風吹五兩
不愁落日轉檣烏鰕魚一尺恰上釣吳姬二十獨當壚
醉歌白雪誰能和擊碎筵中玉唾壺

送日本僧之京

萬里乘濤來絕海中朝冠蓋盡相知丹丘博士與飲酒
青城先生邀賦詩傳鉢底須歸故國把文遂欲動京師

絕憐船上看春色二月官河水發時

越溪

三月雨晴天氣新老夫起整紫綸巾岸花紅白遠迎棹
江燕去來低傍人冷面誰能憎俗子好山吾得作比隣
明時獨媿才卑拙老大猶為江海臣

松下釣魚圖

皎皎月在樹泠泠風滿衣欲問三江口長歌遂不歸

題宋高宗畫扇頭自題云萬木雲深隱連山雨

未開

多時海上日光催猶道千山雨未開
總被浮雲能障斷
龍沙不見翠華回

題江貫道平遠圖

飛鳥欲沒暮煙稠落落人家竹樹秋
絕似南徐城上望
蒼茫野色入揚州

題士宣杏花雙喜

移時山鳥聞芳叢深院佳人晝睡濃
起立階頭驚碧草

不緣風雨落春紅

懷舊

滄江樓上酒初醒
起視林花落曉星
三月到京春雪霽
太行山色馬前青

送郭彥昭北遊

莫聽謳歌倚柁樓
令人愁怨憶南州
一片姑蘇城上月
送郎直過界河頭

題徽廟馬麟梅

龍樓鳳閣美人歌賞盡瓊花碧玉柯
驛使去時渾浪折
江南春色已無多

題范寬小雪山圖

雪壓寒林萬木垂
經旬不與野人期
蹇驢借得如黃犢
猶怕山橋不敢騎

題趙翰林畫馬

大宛前日進龍媒
屹立天墀駿骨開
黃帕寶鞍纔卸却
鑾輿八月上都迴

題李唐秋山圖

萬壑霜飛木葉丹
石橋流水暮生寒
却疑二月天台裏
一路桃花照馬鞍

題五君瑞海棠

白日城南煥氣微
春紅渾欲著春衣
東風吹醒深宮睡
頭白君王萬里歸

西湖圖

二月西湖春似海
南風北風天出雲
美人如花坐船上

學唱竹枝人不聞

寄友

愛爾湖邊草堂靜
青青竹色照人衣
閉門無事開春酒
不管風高柳絮飛

題衛明鉉山水小景為管伯銘賦

故人招我雁山傍
更入秋雲結草堂
至今未滿李徵士
白首猶貪著作郎

鄭采聯壁集附

采字季亮號曲全幼喪二親而賦性狷介州里不
能容兄東時客遊崑山乃走就之求四庫書疾讀
雖暑鑠金寒折膠不越戶限未幾下筆為文皆循
矩度而不輕於毀譽然剛毅忤物晚寓蘇之海虞
竟以坎壈終身焉

出門膏吾車

出門膏吾車欲登崑崙丘崑崙在西極我家東海
頭十步若九轍隣巷亦阻修况茲幾萬里而乃復悠

悠但當努其力歲晏非所憂聞道夕可死聖謨實吾
舟

去婦詞

敝衣尚可澣古鏡尚可磨郎心一昏蔽反覆將奈何緬
懷初嫁時同心指江河江河固上流郎恩中道休娟娟
芙蓉花托根在芳洲驅妾出門去妾身將焉求安得明
月珠置之郎心頭

送姚子章之浙東帥掾

南紀四明雄浙左孤城百雉接風濤越裳客去得犀角
日本船來看寶刀元帥旌旗開外閫掾郎才畧服諸曹
帳中羽檄何須草政愛夔州詩法高

送果上人遊鴈山

雪消山色漲東州最好天台鴈蕩遊背負青天緣鳥道
面承碧雨看龍湫深春林麓多金剝落日江湖自白頭
石上玉芝應拾得念吾無物可消愁

李元珪廷璧集

元珪字廷璧河東人端厚沈毅重然諾酷志讀書
非其人不苟與交作詩若不經思往往超詣穎脫
字法追蹤鮮于伯機曲盡其妙晚年無子留滯吳
中多歎老悲窮之作時往來玉山與諸君唱和楊
鐵崖稱為中州之善學者

感懷

異方久漂泊晚歲羈吳門慷慨俯流水悠悠度朝昏荆

璞獻所知懷寶非有恩達人一傾顧至道千古存富貴
易追逐焉能效奔塵世態日已薄憂心向誰論

春日訪雲林隱君倪元鎮

往歲慕幽隱茲晨適雲林倒屣荷主意下榻情何深取
琴為君彈唐虞有遺音感子曠達志滌我塵煩襟雨過
池草生窗虛松竹陰倚檻俯流水開軒聽鳴琴芳春集
嘉燕酒至還自斟愛客畏言別維舟睇遙岑

南昌諸郎立春次日邀飲江閣

置酒宴江閣濟濟皆郎官素心偶相愜氣味如芝蘭東
風奏微和晴雲靄林端美人歌白雪玉筋行春盤焉知
千里客共此一日歡夕陽下西麓徘徊更凭闌

一日復一日

一日一日復一日百歲能消幾雙履玉龍嘶斷東溟波
春風吹老南山石柳華著水流青萍琅玕弄影生秋聲
霓裳短衣尚堪舞鬪醜眼不再明竹馬兒童誇疾走
檀板梨園歌白首桑根陵谷號飢狐一夜黃河向西吼

芒碭山下赤龍子千古英雄魂不死崆峒重揖廣成公
笑我攜來亂紅紫羲和盡意驅長雲有酒誰酌田文君
燕雀紛紛戲鴻鵠古人道義今無聞東家嬌娥怯春老
曉鏡畫眉鬪新巧開屏自語芙蓉秋妾顏不似當年好
一朝一朝又一朝黃塵車馬長安橋麤衣藿食養心骨
會看鵬背摩青霄

玉山草堂

婁江東流五十里一溪青界婁江水溪中有水山為輝

結廬人住桃源裏虎頭幾葉之雲孫彩袖斑斑奉甘旨
弟兄連壁趨庭隅鸞鳳將一作引雛下階址琪樹香生翠
靄間萱草花明紫芝底龜甲珠簾白玉鈎遠隔鞞紅映
羅綺石田移得少陵居教子經鉏足歡喜張騫泛槎天
上求相見出門驚倒屐有酒在樽琴在几把酒奏琴忘
爾汝珠玉揮毫喧坐起笑我分題續貂尾酒酣休誦德
璋文冰雪相看我老矣

秋莫

秋色已云莫天寒未授衣異鄉三載過倦客幾時歸交
漆惟君久論心見面稀題詩寄清隱江國鴈初飛

梁溪春莫寄范德原

三月梁溪上徘徊憶故人客留山館雨花落野橋春愧
我無兒子憐君有老親何時相對榻重與話酸辛

梁溪留別虞彥高

野人情曠達志不在輕肥夜雨三更夢春江一棹歸神
駒難並駕鷺鳥不羣飛老去纔聞道吾生漸覺非

客海陵光孝寺秋深感懷二首簡盛克明

海陵蕭寺裏獨客感秋深只有君知己更無人聽琴
鵲天共影促織夜偏吟回首南塘路凋殘楓樹林
孤燈照無寐飄泊寄僧房蕙草零秋露莎雞啼夜牆
愁來嗟伯道老去憶馮唐曉把青銅鏡生憎鬢底霜

次韻遊虎丘

寶刹近城郭峰從海湧來千人盤石側絕壁劍池開
聞道吳王塚今為釋氏臺古碑題木客陳迹幾風埃

冬至日試筆奉寄玉山主人

馳逐為家貧陽生歲又新
鬚眉半將白天地一閒人
梅萼香東閣桐陰靜北隣
玉山有佳士念我走風塵

冬日平江寄倪元鎮

此首見玉山錢別寄贈詩題作代簡玉山

玄文館裏逢君日

玉山錢別寄贈詩作芝雲堂上西窓夜

剪燭傳杯夜

一作

共話時寒月半窓親
下榻幽人滿坐共

一作對

吟詩無鬼

守舍馮唐老有客分金鮑叔知
咫尺維舟一作玉山空悵望

封題聊為寄相思

雨中夜宿瓜洲江浦

春陰江浦易黃昏
雨裏人家早閉門
歸鴈雲間知塞路
過帆沙嘴帶潮痕
遙瞻北固青山郭
只隔南淮綠水邨
野寺疎鐘到孤枕
閒愁清夜與誰論

秋莫夜宿望亭

茅屋沿隄密掩扉
官橋昏黑泊船稀
守闕戍火明邨隲
隔岸漁燈照石磯
寒木盡隨谿雨落
斷鴻猶趁野雲飛
篷窗欹枕渾無寐
倦聽人家夜擣衣

浣花館

浣花溪上界溪頭愛汝新成小隱幽
日日花間頻洗餼
時時柳外更維舟
春風繡幕圍歌扇
夜月珠簾控玉鉤
倚杖看雲雙眼豁
功名富貴等浮沤

題梅花士女

夢裏尋香出曉城
一聲殘角暗魂驚
美人不作羅浮夢
獨倚梅花看月明

題文湖州湘中推篷圖

岳王樓前湖水邊
離歌驚覺鷓鴣眠
生綃一幅秋雲亂
又上江南客子船

江行春莫

江岸薔薇也自紅
可憐夜雨落花叢
不如燕子知人意
箇箇飛來近短篷

白鷗

幾箇白鷗真可愛
碧波蕩漾即為家
春江正喜中流急
又闕潮頭過淺沙

和西湖竹枝詞二首

郎去遠過江上山望郎江上幾時還只怕郎歸不相識
湖邊日日照容顏

三月湖邊花正開江邊望船郎未回燕子來時春又去
心酸不待喫青梅


題叢山題扇圖

筆花閒落素紈雲闕映芳衢老眼昏明月曉烟生曙色
應憐不識右軍門

元詩選三集卷十一

謹案第九頁前六行裕勒雅克明舊作月彥明今
改後倣此





總校官候補中書臣吳紹潔

校對官庶吉士臣曹錫齡

謄錄監生臣楊愈柳